



Tuis by die Fakulteit Teologie: Prof Johannes du Plessis, die afgesette hoogleraar van die destydse Teologiese Seminarium op Stellenbosch, se standbeeld staan nou uiteindelik op die terrein van die Fakulteit Teologie. Van diegene wat die onthullingsgeleentheid bygewoon het, is mnr Pierre du Plessis, 'n kleinkind van prof Du Plessis. (Foto: Anton Jordaan, SSFD)

Totsiens, prof Park

Die Fakulteit Opvoedkunde neem binnekort afskeid van sy dekaan, prof Tommy Park, wat diep spore getrap het in nie net die groei en ontwikkeling van die Fakulteit nie, maar ook in die Universiteit in sy breë sedert hy in Januarie 1998 voltydse dekaan geword het.

Na voltooiing van sy skoolloopbaan in die Noord-Kaap het hy die BSc-graad en SOD aan US verwerf, waarna hy 'n ruk in die onderwys was.


Hy het op 1 Julie 1979 in diens van die Universiteit getree as lektor in die Departement Didaktiek (tans die Departement

Kurrikulumstudie), waarna hy in 1982 tot senior lektor en in Julie 1985 tot professor in hierdie departement bevorder is. Hy is 'n vorige ontvanger van die Rektor se Toekenning vir Voortreflike Onderrig.

Op universiteitsvlak het prof Park oor baie jare 'n sterk rol t.o.v. gehalteversekering aan die US gespeel, onder meer as lid van verskeie komitees. Hy was ook voorsitter van die US se Hertoelatingskomitee en sameroeper van 'n US Sakeplanprojek wat ondersoek ingestel het na die verhoging van deurvloei koerse aan die US.

Prof Park het ook 'n baie sterk leiersrol gespeel in die strategiese posisionering van die Fakulteit ten opsigte van afstandsonderwys en onder sy leiding het die Kampus 2-inisiatief - nagraadse programme wat deur middel van telematiese uitsendings afgelewer word - 'n stewige beslag gekry.

Op nasionale gebied het hy waardevolle bydraes tot die ontwikkeling van 'n nuwe onderwysbeleid gelewer. Hy was in 1995 lid van die Nasionale Komitee vir die Hersiening van die Organisasie, Beheer en Befondsing (die Hunter-Kommissie), asook lid van die destydse Minister van Onderwys se ministeriële onderhandelingspan met die oog op die formulering van die Suid-Afrikaanse Skolewet in die laat 1990's. Verder was hy ook lid van die Komitee vir die Hersiening van die Norme en Standaarde vir Onderwysersopleiding, 'n beleid wat vandag die basis van alle onderwysersopleiding in die land vorm.

Sy puike bestuurs- en leierskapvermoë, asook sy skerp humorsin, sal gemis word. 

Prof Johannes du Plessis weer terug by Kweekskool

Die standbeeld van die afgesette hoogleraar van die destydse Teologiese Seminarium op Stellenbosch, prof Johannes du Plessis, is vroeër vanjaar op die terrein van die Fakulteit Teologie onthul nadat dit in 'n gebaar van versoening hierheen verskuif is.

Die standbeeld – vir lank onder studente bekend as “Pienk Piet” – wat deur die groep Vriende van Du Plessis ná sy dood in 1935 opgerig is, is al 'n paar keer die afgelope 70 jaar verskuif. Nou, na 35 jaar se geswoeg, is die standbeeld en die muur, wat die Du Plessis-familieleuse “God verdedig die reg” dra, herenig.

Prof Du Plessis se skoonogter, me Elise du Plessis, wat met prof Du Plessis se seun Jan getroud is, en die egpaar se seun, Pierre, het die verrigtinge bygewoon. Mnr Du Plessis het hulde aan sy oupa gebring deur familiestories oor prof Du Plessis met die gehoor te deel.

Dr Frits Gaum, oudredakteur van die Kerkbode, het gesê dat die Kerk deur middel van die verskuiwing van die beeld erkenning gee aan die bydrae wat prof Du Plessis tot die teologie gemaak het en om verskoning vra vir die gruwelike manier waarop die Kerk hom hanteer het.

“Mag ons deur hierdie voorbeeld die les leer om ander kerkmense en dié wat van ons verskil nie as ketter en dwaalleraar te brandmerk en by ringe aan te kla nie, dat ons leer dat reg nie deur onreg gedien kan word nie en dat die Kerk ook om verskoning kan vra,” het dr Gaum gesê.

Prof Du Plessis het destyds 'n regsaksie teen die NG Kerk van Suid-Afrika gebring nadat hy deur die Kaapse Kerk afgedank is weens bewerings dat hy leerdwaling sou gepleeg het. Dit het gevolg nadat die Kuratorium van die Seminarium van Stellenbosch by die Ring van Stellenbosch gekla het dat prof Du Plessis se teologiese standpunte nie in ooreenstemming met dié van die NG Kerk sou wees nie. Prof Du Plessis het daarop klem gelê dat die Bybel eerstens in sy verskillende historiese ontstaanskontekste bestudeer moet word. Sy standpunte het nie ondersteuning in die destydse Kerk gehad nie en hy is in 1932 afgedank.

“Die Fakulteit Teologie en NG Kerk Kuratorium het hul heelhartige steun aan hierdie verskuiwing toegesê. Die standbeeld, waarvan die laaste staanplek by die Sasol Kunsmuseum op Stellenbosch was, is nou tesame met die muur wat oorspronklik daarmee saam opgerig is, verskuif. Met hierdie gebaar wil die Fakulteit en NG Kerk Kuratorium erkenning gee aan die breedte en diepte van prof Du Plessis se teologiese bydraes – bydraes wat dikwels weens die omstredeheid van die destydse hofspraak versluier geraak het,” het dr Louis Jonker, dosent in die Departement Ou en Nuwe Testament, tydens 'n vorige geleentheid gesê.

Die onthulling het gepaard gegaan met 'n aantal lesings waarin die bydraes van prof Du Plessis belig is, asook met 'n uitstalling van sy werke en besittings. 